

Organisasi komersial pertama didakwa rasuah

Pristine Offshore dituduh beri suapan dapatkan kontrak cari gali minyak

Oleh Norzamira Che Noh
bhnews@bh.com.my

Shah Alam: Syarikat penyewaan kapal menjadi organisasi komersial pertama didakwa berhubung rasuah RM321,350, bagi kesalahan memberi suapan mendapatkan kontrak penyewaan kapal dalam kerja gali minyak, tahun lalu.

Tertuduh, syarikat Pristine Offshore Sdn Bhd yang diwakili Pengarahnya, Datuk Abdul Kamal Mohd Mydeen, 70, mengaku tidak bersalah selepas pertuduhan dibacakan di hadapan Hakim Mahkamah Sesyen, Rozilah Salleh.

Abdul Kamal baru memegang jawatan pengarah syarikat berkenaan pada Disember tahun lalu.

Mengikut kertas pertuduhan, syarikat berkenaan sebagai organisasi komersial melakukan kesalahan kerana seseorang yang bersekutu dengan syarikat itu iaitu Pengarah, Chew Ben Ben, 64, secara rasuah memberikan kepada Ketua Pegawai Operasi syarikat, suatu suapan bagi faedah dirinya, iaitu wang sejumlah RM321,350.

Suapan itu untuk memper-



Abdul Kamal (dua dari kanan) dan Ben Ben (kiri) dihadapkan ke Mahkamah Sesyen Shah Alam, semalam.

(Foto Faiz Anuar/BH)

oleh perniagaan bagi syarikat berkenaan, iaitu memastikan dianugerahkan subkontrak penyewaan kapal dalam kerja cari gali minyak.

Syarikat berkenaan melakukan kesalahan mengikut perenggan 17A(1)(a) Akta Suruhanjaya Pencegahan Rasuah Malaysia 2009, yang boleh dihukum mengikut subseksyen 17A(2) akta sama.

Sabit kesalahan, boleh denda tidak kurang daripada 10 kali ganda jumlah atau nilai suapan yang menjadi hal perkara

kesalahan itu, jika suapan itu dapat dinilai atau berbentuk wang, atau RM1 juta, mengikut mana-mana yang lebih tinggi; atau dipenjarakan selama tempoh tidak melebihi 20 tahun; atau kedua-duanya.

Tertuduh didakwa melakukan kesalahan itu antara 29 Jun dan 14 Oktober 2020 di Bandar Kinrara, Puchong.

Terdahulu, Timbalan Pendakwa Raya SPRM, Ahmad Akram Gharib menawarkan wang jaminan RM200,000 dengan seorang penjamin sama ada pe-

gawai atau pengarah syarikat, bagi memastikan kehadiran semasa perbicaraan.

Syarikat itu yang diwakili peguam Bernard Francis, Chong Ki Keong serta Azim Razak, bersetuju dengan jumlah jaminan yang ditawarkan dan Abdul Kamal akan menjadi penjamin.

Mahkamah kemudiannya membenarkan permohonan pihak pendakwaan dan pembelaan, manakala tarikh sebutan semula kes ditetapkan 25 Mei depan.